

Durante e anochi di introduci e elenco di actornan pa e pelicula "Nos Destino"...

297 AWARD TA RECONOCE JAN POETS CU PREMIO "HALL OF FAME"...

** Ayeranochi den Renaissance Ballroom durante e evento di gala pa introduci e elenco di actor y actriznan cu lo bai forma parti di e pelicula "Nos Destino" produci pa 297 Studio, mi persona den compania di mi familia, a ser sorprendi na momento cu e director di 297 Studio, Roderick Lopez, ta introduci un video clip na unda mi prome sorpresa tabata pa mira mi intro di PoetsTV, pa despues bolbe haya un otro sorpresa pa mira mi dos yiunan hunto cu mi nieto riba pantaya ta expresa con orguyoso nan ta di nan Tata, cual ta pa prome biaha mi ta mira mi dos yiunan ta papia dilanti camera. E di tres sorpresa tabata na momento cu Roderick Lopez ta yama mi riba stage pa ricibi un plakaat y ta anuncia cu mi tin e honor pa ricibi e prome premio di 297 Award como PREMIO HALL OF FAME. Despues cu Roderick a splica e publico e motibonan cu mi a bin na remarca pa ricibi e prome premio aki, Roderick a pasa e microphone pa mi y den e emoshon di sorpresa sin ningun speech prepara mi a expresa mi gratitud na 297 Studio y alaves conta un tiki di mi historia den cual mi recuerdonan a cuminsa na mi amigo Hildward Croes (q.e.p.d.) kende tabata e prome musico cu a habri e caminda internacional pa mi por a cubri varios giranan grandi cu Juan Luis Guerra y su 440 y despues cu el a bai forma parti di Chichi Peralta y Son Fania. Na dadomento mi a bira emoshonal y no por a contene mi lagrima di e lamentabel perdida di nos amigo Hildward Croes na kenda mi a dedica e Premio Hall of Fame. Tambe mi no por a laga afor e cobertura historico di Dr. Edward Cheung di e ultimo lansamento cu porcierto mi a invita Roderick Lopez pa bai yuda mi filma e interesante trabao di Dr. Edward Cheung riba e historico ultimo lansamento di un Space Shuttle na NASA. Mi ta gradici Roderick Lopez y 297 Studio pa e tremendo reconocimiento y ta desea nan hopi exito cu nan pelicula 'NOS DESTINO', cual den luna di December proximo lo bai ser estrena den gran forma.

